

■ CURTAS ISTORGIAS DAVART LA DEMOCRAZIA (13)

Gudagnar per sai il pievel

DA CORINA CASANOVA,
CHANCELIERA FEDERALA

Quellas e quels che lesan avair success en la politica ston avair blers amis e partisans per obtgnair ina carica. Ma en ina democrazia na basta quai betg: Tgi che less vegnir elegì dal pievel sto gudagnar per sai er las electuras ed ils electurs. En il mussavia electoral da Quintus Tullius per ses frar Marcus Cicero chattain nus er recumandaziuns per cuntanscher questa finamira.

Per mintga candidatura son ins per l'ina avair blers amis e partisans e per l'otra tschertgar cuntinuada main la favur da las massas. A quellas plaschi «ch'ins clomia ellas per il num, ch'ins fetschia plaschentinias, ch'ins fetschia las bellinas, ch'ins salidia, vegnia en visita, ch'ins saja generus, ch'ins haja in bun num e ch'ins demussia qualitäts d'in um da stadi».

Tenor il «Commentariolum petitionis» da Quintus Tullius Cicero valan per il far las bellinas e per il lusingiar sco er per il gudagnar amis autras reglas

durant la temporada dal cumbat electoral ch'en la vita da mintgadi. Normalmain èsi immoral da far las bellinas e da vender sia amicitia. Durant ina campagna electorala è tut quai dentant inevitabel e perquai è er permess in tschert opportunissem. In candidat sto restar moralmain ferm internamain, envers anora dastga el dentant «adattar sia fatscha, ses frunt e ses discurs al pensar ed als basegns da mintga visavi».

Generus e modest durant la campagna electorala

In talent teatral è damai tenor quest um da stadi insatge fitg util per ina candidatura, ed er da posseder ina massa raps na fa betg donn. Betg mo per pudair finanzia tut ils viadis ch'en necessaris per il cumbat electoral, mabain er per pajar tut las invitaziuns, las tschainas ed ils aperos ch'ins sto organisar sco candidat e per remunerar las assistentas ed ils assistents che trategnan ils amis e partisans.

Quintus Tullius Cicero recumonda: «Ti stos esser qua di e notg per tes

simpatisants. I na basta betg d'avrir mo la porta da tia chasa, ti stos avrir er tia fatscha e tes frunt sco portas a tia olma. Sche tia mimica e tes discurs signaliseschan che ti has pensaments zuppads e serrads, na gidi nagut d'avrir las portas da tia chasa.» Las massas na spetgan betg mo simplas empermischuns, mabain empermischuns generusas ed onurificas.» Er perquai recumonda Cicero a ses frar: «Ti stos procurar che tut tia candidatura saja fitg pompusa, ch'ella dettia en egl, ch'ella saja impressiunanta e fetschia sensaziun.» Al medem mument n'apprezieschia il pievel betg in deputament arrogant u autoritar. Las simpatias dal pievel retschaviva quel candidat che respectia ils interess dal pievel, che tractia demonstrativamain bain las massas e che haja la pli gronda popularitad.

Uteriurs cussegls da Quintus Tullius Cicero datti en la proxima contribuziun. Tut las istorgias davart la democrazia e la pussaivladad da commentar ellas datti sin mes blog en l'internet sut www.bk.admin.ch/chanceliera.